



Cumissiun per optimar l'organisaziun communal

Nominaziun da quater cusseglier(a)s

M E S S A D I

dalla suprastanza communal al cussegl da vischnaunca

Stimau signur president
Preziadas signuras cusseglieras
Preziai signurs cussegliers

1. Situaziun da partenza

Mustér ei ina ferma ed impurtanta vischnaunca en Surselva. La suprastonza communal vul era egl avegnir garantir la cumpetitivitad necessaria e posiziunar Mustér sper Glion sco subcenter dalla Surselva. Aschia astgein nus buca tralasar da sviluppar vinavon nossa vischnaunca. Consequentamein ein las finamiras dalla vischnaunca da Mustér per la perioda d'uffeci 2021-2024 fetg aultas. Mintga responsabel da departament ha pliras finamiras ch'el vul contonscher. Il plan da mesiras en detagl pils proxims quater onns per mintga finamira ei definius. Sper las finamiras generalas sco da segirar e mantener las vias communalas dat ei era pliras finamiras e plirs projects da svilup ch'ins vul realisar ni iniziar ils proxims onns. Per numnar mo entgins projects da grond'impurtonza:

- Sviluppar il center dil vitg
- Planisaziun locala / planisaziun d'utilisaziun (Nutzungsplanung)
- Optimar e crear novas colligiaziuns a pei e da traffic plaun
- Instradar ina periodica per garantir ina buna comunicaziun anoviars
- Sustegn ella planisaziun per differents projects dallas pendicularas
- Sanaziun ed engrondaziun serenera
- Niev project d'avertura dalla via forestala Val Segnas – Val Sogn Placi

2. Analisa

La suprastonza communal vul culs projects supplementars numnai ed aunc bia auters (mira finamiras e plan da mesiras) sviluppar vinavon la vischnaunca. Per dumignar la lavur da mintgadi e per saver garantir in bien ed attractiv svilup da nossa vischnaunca drova ei las resursas necessarias. En quei connex duei vegnir analisau da rudien las structuraz existentas, ils process da lavur e corrispundentamein era adattau ils regulativs ed ils reglaments. En quei entir process vegn medemamein analisau las cumpetenzas finanzialas e las responsabladads dalla suprastonza communal e dalla direcziun. Plinavon vegn surluvrau il plan da piazzas, igl uorden da cumpetenzas, ils survetschs generals (spurtegl, telefon) ed analisau il baghetg sco tal (casa communal).

3. Regulativs - revisiun parziala

El rom dil process dall'analisa duein suandonts regulativs vegnir surluvrai:

- En cumpetenzza dil cussegl da vischnaunca:
 - o Regulativ per il persunal communal
 - o Regulativ d'indemnisaziun
- En cumpetenzza dalla suprastonza communal:
 - o Reglament davart il temps da lavur per l'administraziun communal
 - o Reglament per la direcziun communal

4. Cumissiun speciala

La cumissiun exista dil president communal (meina las sedutas) e quater cusseglier(a)s. Il cussegl da vischnaunca nominescha las persunas dil cussegl da vischnaunca che duein seser ella cumissiun numnada. Ils commembers dalla cumissiun san quintar cun rodund 3-5 sedutas (mintgamai tard il suenter miezdi ni encunter sera) el decuors digl avrel-matg 2021. Il giavisch dalla suprastanza communal en general en connex cun la cumposiziun da cumissiuns futuras ei ina buna mischeida denter dunnas ed umens.

5. Tractaziun

Il cussegl da vischnaunca vegn prevedentamein a tractar la fatschenta en sia seduta dil zercladur 2021.

6. Ponderaziuns finalas

La finamira ei in'organisaziun effectiva e cunzun flexibla cun la quala nus savein realisar ils projects necessaris per garantir el futur in svilup progressiv en nossa vischnaunca.

Proposta

Sin fundament dallas ponderaziuns suramenziunadas

p r o p o n a

la suprastanza communal al cussegl da vischnaunca:

1. da nominar quater persunas ord il ravugl dil cussegl da vischnaunca per la cumissiun speciala "optimar l'organisaziun communal" per mauns dall'elecziun entras la suprastanza communal.

Suprastanza communal Disentis/Mustér

Il president:

Il canzlist:

René Epp

Andri Hendry

Disentis/Mustér, ils 9 da fevrer 2021